



HOtherus ex regum Suetiæ familia prognatus, atque à Geuaro uiro prudentissimò educatus fuit. adolescens factus coæuis suis summa corporis firmitate præstabat. Ingenio etiam multas artes didicerat: quippe natationis, arcus, cæstumq; peritia omnes superabat. Nemo illo chelis aut lyrae doctior erat. nam ad quoscunque uolebat motus, uarijs modorum generibus humanos impellebat affectus. Tot iuuenis artibus instructus Namnam Geuari alumni filiam uxorem duxit. Erat quidam Balderus Othini magi filius, iisdem artibus quibus pater imbutus, qui et ipse magno huius puellæ desiderio flagrabat. Itaq; aliquoties Balderus

& Hotherus congressi, dubio Marte inuicem discesserunt. Tandem uerò Hotherus à Mimingo sylvarum satyro talem gladium accepit, quo cõtra omnes magorum præstigias loricas, uestes, & cutem scindere posset. Itaque eo accepto Balderum prostrauit, & magnum sibi fortitudinis nomen comparauit.